



910/1-6/22
03-02-2022

საქართველოს ენერგეტიკისა და წყალმომარაგების
მარეგულირებელი ეროვნული კომისიის
თავმჯდომარეს ბატონ დავით ნარმანიას

ბატონო დავით,

გთხოვთ, საქართველოს პარლამენტის რეგლამენტის 148-ე მუხლის პირველი პუნქტის შესაბამისად, ამავე მუხლით დადგენილ ვადაში, მოგვაწოდოთ შემდეგი ინფორმაცია:

რამ განაპირობა 2021 წლის 25 ნოემბერს, საქართველოს ენერგეტიკისა და წყალმომარაგების მარეგულირებელი ეროვნული კომისიის №44; N45; N46; N47, N48, N49 და N50-ე დადგენილებებით, „ბუნებრივი გაზის ტარიფების შესახებ“ საქართველოს ენერგეტიკის მარეგულირებელი ეროვნული კომისიის (სემეკ) 2005 წლის 30 დეკემბრის №30 დადგენილებაში ცვლილების შეტანა და 2022 წლის 1 იანვრიდან გაზის ტარიფების ზრდა.

ახორციელებს თუ არა საქართველოს ენერგეტიკისა და წყალმომარაგების მარეგულირებელი ეროვნული კომისია, ენერგეტიკული ბაზრის ზედამხედველობის ფარგლებში, კომისიის მიერ გაცემული ლიცენზიის საფუძველზე, ბუნებრივი გაზის მიმწოდებელი კომპანიების მხრიდან, საბოლოო მომხმარებლის მიერ ბუნებრივი გაზის მოხმარების სწორად აღრიცხვის მონიტორინგს და რა რეაგირებას ახდენს მსგავსი დარღვევების აღმოჩენის შემთხვევებში.

პატივისცემით,

პარლამენტის წევრი
ლევან იოსელიანი





09/02/2022

N 1/09-1-1277

1277-1/09-1-2-202202090954



საქართველოს პარლამენტის წევრს,
ბატონ ლევან იოსელიანს

ბატონო ლევან,

თქვენი 2022 წლის 3 თებერვლის №910/1-6/22 წერილის პასუხად გაცნობებთ, რომ საქართველოს ენერგეტიკისა და წყალმომარაგების მარეგულირებელი ეროვნული კომისიის (შემდგომში - კომისია) 2014 წლის 25 დეკემბრის №33 დადგენილებით დამტკიცებული „ბუნებრივი გაზის ტარიფების გაანგარიშების მეთოდოლოგიით“ (შემდგომში - სატარიფო მეთოდოლოგია) განსაზღვრული პრინციპების შესაბამისად, ბუნებრივი გაზის განაწილების ლიცენზიატებისა და მიმწოდებლებისთვის კომისიის მიერ დადგენილ იქნა შესაბამისი ტარიფები 2020-2022 სატარიფო რეგულირების პერიოდზე.

აღსანიშნავია, რომ სატარიფო მეთოდოლოგიის 28-ე მუხლის პირველი პუნქტის გათვალისწინებით, ბუნებრივი გაზის განაწილების/გატარების ტარიფები ექვემდებარება კორექტირებას იმ შემთხვევაში, თუ საწარმოს წლიური ანგარიშის ანალიზის შედეგად გამოვლინდა, რომ საანგარიშო წლის კორექტირების მოცულობა უდრის ან აღემატება შესაბამის წელს ბუნებრივი გაზის განაწილების/გატარების ტარიფით მისაღები შემოსავლის 10%-ს დადებითი ან უარყოფითი ნიშნით. აღნიშნულის ფარგლებში კომისიის აპარატმა განახორციელა განაწილების ლიცენზიატი საწარმოების მიერ კომისიაში წარმოდგენილი 2020 წლის აუდირებული ფინანსური ანგარიშგების შესწავლა და ანალიზი თითოეული მათგანისთვის სატარიფო გაანგარიშებაში ასახულ მაჩვენებლებთან დაკავშირებით და ამ კონტექსტში, პირველადი ანალიზის შედეგად გამოიკვეთა, რომ კორექტირებას დაქვემდებარებული კომპონენტების დაგეგმილ და ფაქტობრივ მაჩვენებლებს შორის სხვაობა აღემატებოდა 10%-ს შემდეგ ლიცენზიატ საწარმოებთან მიმართებაში: შპს „თელავგაზი“, შპს „გოგოჭური და კომპანია“, შპს „დი-ვი-ეს“, შპს „გამა“ და სს „საჩხერეგაზი“.

აღნიშნულის შესახებ შესაბამისი წერილებით ეცნობა ზემოთ ჩამოთვლილ საწარმოებს, რომლებმაც ბუნებრივი გაზის განაწილების ტარიფის კორექტირების მიზნით კომისიაში წარმოადგინეს შესაბამისი სატარიფო განაცხადები კომისიის მიერ განსაზღვრულ ვადაში.

ამასთან, ვინაიდან სატარიფო მეთოდოლოგიის 28-ე მუხლის მე-4 პუნქტის გათვალისწინებით კომისია უფლებამოსილი იყო განხორციელებინა სატარიფო რეგულირების პერიოდზე დადგენილი ბუნებრივი გაზის მიწოდების ტარიფის კორექტირება ბუნებრივი გაზის შესყიდვის ფასით ეროვნულ ვალუტაში სატარიფო წლის შიგნით საწარმოს მიერ წარმოდგენილი დასაბუთებული მოთხოვნის საფუძველზე (რომელიც თავის მხრივ, უნდა ეფუძნებოდეს გარკვეულ ფაქტობრივ მონაცემებსა და გარემოებებს), შპს „თელავგაზმა“, შპს „დი-ვი-ეს“-მა და სს „საჩხერეგაზმა“ ბუნებრივი გაზის განაწილების ტარიფის კორექტირებასთან ერთად მოითხოვეს ბუნებრივი გაზის მიწოდების ტარიფის კორექტირება, ხოლო შპს „ყამარი მ“-მა და შპს „დიდი დილომა“ მოითხოვეს მხოლოდ მიწოდების ტარიფის კორექტირება, რაზეც თავის მხრივ წარმოადგინეს შესაბამისი დასაბუთება ფაქტობრივი მონაცემებით.

ყოველივე ზემოაღნიშნულის გათვალისწინებით, განხორციელდა საწარმოების სატარიფო რეგულირება და კომისიის 2021 წლის 25 ნოემბრის №45 და №47 დადგენილებებით შპს „გოგოჭური და კომპანიას“ და შპს „გამას“ დაუდგინდათ ბუნებრივი გაზის განაწილების ტარიფები, №49 და №50 დადგენილებებით შპს „ყამარი მ“-ს და შპს „დიდი დილომა“ - ბუნებრივი გაზის მიწოდებისა და მოხმარების ტარიფები, ხოლო №44, №46, და №48 დადგენილებებით შპს „თელავგაზს“, შპს „დი-ვი-ეს“-ს და სს „საჩხერეგაზს“ - ბუნებრივი გაზის მიწოდების, განაწილების, გატარებისა და მოხმარების ტარიფები.

კომისია მოქალაქეთა განცხადებებისა და საჩივრების განხილვის პროცესში ადმინისტრაციული წარმოების ფარგლებში ამოწმებს კომპანიების მიერ განხორციელებული დარიცხვის კანონიერებას და შესაბამისი საფუძვლის არსებობისას ახდენს დარიცხვის გაუქმებას ან კორექტირებას. 2017 წლიდან 2021 წლის ჩათვლით გაზზე დარიცხვების თაობაზე შემოსულია სულ 1986 განცხადება/საჩივარი, მათ შორის დაკმაყოფილდა 919 განცხადება/საჩივარი, ხოლო მომხმარებელთა სასარგებლოდ ჩამოწერილმა თანხამ შეადგინა 1 185 957.16 ლარი.

პატივისცემით,

დავით ნარმანია

კომისიის თავმჯდომარე

